

8. november 2022

**Atorfimmi peqquserlunnerup akiornissaanut Naalagaaffiit Peqatigiit isumaqatigiissu- taannut Kalaallit Nunaata ilanngunneqarnissaanik matumalu aalajangiiffigisassatut siunnersuutip akuerineqarnerata kingunitsianngua tamatuma sulissutigineqalernissaa aallartinneqaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq, Asii Chemnitz Narup, Inuit Ataqtigiit)

Inuit Ataqtigiit tunuliaqutigalugit Inatsisartuni ilaasortaq Asii Chemnitz Narup siunnersuutaa Siumumiik imaattumik oqaaseqarfigissuarput.

Siunnersuut soqutiginarloq aammalu pingaaruteqarluinnarpoq isumaqarpugut, tassami assigukannersunik siornatigut siunnersuuteqartarnikuuvugut, tassa suliffeqarfissuit aningaasarsiornikkut iluanaarutaasa nunatsinniik anngiortumik aniasannginnissaat qulakkeerniarlugu misissuinissamik siunnersuuteqarnikuugatta, siunnersuut taanna Inatsisartuni akuerineqarnikuuvoq Naalakkersuisullu ukiuni kingullerni oqaatigiuartarpaat siunnersuut suliarineqartoq taamaattorli inerneru ulloq manna tikillugu takusimangisaannarparput.

Pisortat aningaasaleeqataaffigisaannik sanaartukkanut angisuunut, aatsitassarsiornermi suliffeqarfinnilu allani aningaasartuutigisartakkatsinnut aningaasanik allanilluunniit peqquserluttarnerup akiortuarnissaa Siumumi pingaartitatta ilagivaat. Tamakkua akiorniarlugit suliniaqatigeeqarpoq nunatsinni nunanilu allani. Naalakkersuisut akissuteqaataanni misissuinerup takutissimavaa peqquserluttarneq nunatsinni ajornartorsiutaasoq annertoq aammalu ilisimavarput unnerluutiginninniaraluit arlalinnik peqquteqarlutik tunuarsimaartarsimasut.

Siunnersuuteqartup anguniarpaa Naalagaaffiit Peqatigiit isumaqatigiissutaat nunatsinni atuutsilerneqarnissaa anguniarlugu Naalakkersuisut sulissuteqassasut Naalakkersuisulli allannguutissamik siunnersuuteqarput, Naalagaaffiit Peqatigiit isumaqatigiissutaannut nunarput ilanngutinngikkaluarluni atorfimmi peqquserlunnerup akiornissaanut suut aalajangersimasut iliuuserineqassanersut pillugit ataatsimoorussamik sulissuteqartoqassasoq. Tassa imaappoq siunnersuut tunngaviatigut isumaqatigineqarpoq taamaattorli paasiniaaqqissaarnerit ingerlanneqareersimasut, aamma inatsisitigut malitassanillu suliaqartoqarnikuunera aamma suliffinni politikkiliorloqarnikuunera il. il. tunngavilersuutigalugit allannguutissatut siunnersuut saqqummiunneqarpoq.

Siumumiik taamatut oqaaseqarluta siunnersuuteqartup saqqummiussaa aammalu Naalakkersuisut allannguutissatut siunnersuutaat ataatsimiititaliami susassaqtumi nalilersorluarneqarnissaat innersuussutigaarput.

Doris J. Jensen, Siumut